

FE'AU MO LE KERISIMASI 2009 MAI LE FAILAUTUSI AOA O LE FAAPOTOPOTOGA A 'EKĀLĒSIA KERISIANO O LE LALOLAGI

'O ia o le fa'atusa o le Atua e lē va'aia, 'o le ulumatua o mea 'uma lava 'ua faia, 'auā na faia e ia o mea 'uma lava, 'o mea i le lagi ma mea i le lalolagi, 'o mea 'o va'aia ma mea e lē 'o va'aia, 'o nofoāli'i ma ali'i, ma ali'i sili, ma faipule fo'i mo ia. 'O ia fo'i 'o le ulua'i o mea 'uma lava iā te ia. *Kolose 1:15 -17 (NRSV)*

'O le mālamalama 'o le fa'atusa lea o fofoga fiafia ma le silisili'ese o le Atua i le foafoaga, aemaise lava i le vaitau lenei o le Kirisimasi. 'Ua fetalai mai le Atua, "Ia mālamalama!"¹ – ona Ia fausia lea o le lalolagi. O le fānau mai o Iesu, na sulu ai e ave malolosi o lea mālamalama le pōuliuli – ma ua lē toe mafaia e le pōuliuli ona fa'ato'ilalo le mālamalama, o le anava-tau a le Atua soifua.²

'O le Kirisimasi 'o le vaitau e usuina ai vi'iga,³ peita'i i lenei meleniuma ma le fa'aleagaina o le si'iso'i'omaga 'ua tauau ina tatou fa'atuatua' ai ona avatu le vi'iga i le Atua e tusa ai ma vavega tetele ua ia faia. 'Ua tau lē lagona atu pēsega a itūlagi i le fa'aleagaina o le 'ea e kasa 'ese'ese ma le pa'ō o masini, le fa'atupulaia pea o le suiga o le tau i le sousou o le sami, le mātagōfie felanulanuai o le olaga 'ua fa'amātagāina e faiga fa'alēalofa 'ona 'o le matape'ape'a. Aua a afaina ma māfatia le lalolagi, 'ua fa'apēnā fo'i ē 'olo'o nonofo ai. E pei ona iai nei, 'o ē mātitiva ma tagata lautele 'ua tusi 'esea 'ma ua latou mautinoa ua faigatā tele ona si'i o latou leo i pēsega.

I le vaitaimi o Maria ma Iosefa, na talitonu ma faamoemoe le Emepera o Aukuso i le mālosi nai ona lima. Na ia faia ai se fa'ai'uga aloa'ia e fa'apea o le "lalolagi 'ātoa" ('upu o le tusi pa'ia *oikoumene*)⁴ e tatau ona totogi lāfoga. Sa iai se ulugāli'i lē tualoa na aga'i atu 'i Petele'ema mo lea faamoemoe. Peita'i na 'ese' fuafuluga a le Atua i le talafa'asolopito, ma 'o lenei 'ua tatou mālamalama i nofoāli'i, ali'i, ma ali'i sili ma faipule i lo latou faia ma le lē iloa 'ina 'ia fa'ataunu'u valo'aga tāua. 'O Iesu, 'ae lē o le 'emepera, 'o ia o le ulumatua o mea 'uma lava, 'olo'o fa'atūmauina foi mea 'uma lava iā te ia".⁵

Fai mai le taofi o se tasi tagata fai-tofa o le Tusi Pa'ia e igoa ia Barbara Rossing, 'o pulega tuai, poo pulega fa'atupu *oikoumene* a Kaisara – fa'atasi ai ma le tamaoaiga i ona pō nei, o le militeli ma pūlega fa'apolokiki – 'ua fano. Peita'i o le faamalosi'au a au perofeta ma le au 'aposefelo, e iai le foafoaga fou a le Atua – 'o le *oikoumene* moni lea – 'o le fa'afouina lea o le Aiga o le Atua.⁶

'Ia tatou tatalo mo se suiga ma ofo atu o tatou tagata e fai ma mea faigālua o le fa'afouina.⁷ Tatou fa'atuatua pea i le toe afio mai o Iesu Keriso, e iai le foafoaga fou 'ina 'ia taunu'u le pese a 'āgelu – O le leleiga a le Atua, le tagata ma le ola 'uma na ia faia.⁸

Rev. Dr Samuel Kobia
Failautusi Aoa
Faapotopotoga a Ekalesia Kerisiano o le Lalolagi

¹ Kenese 1:3

² Ioane 1:4-5

³ Luka 2:14

⁴ Luka 2:1

⁵ Kolose 1:17; Salamo 2:7-10

⁶ Isaia 65:17; Faaaliga 21-22

⁷ 2 Korinito 4:16

⁸ 2 Korinito 5:17-20